

# RAHSIA KEKUATAN KITA

## PENGERTIAN SAUDARA DALAM ISLAM

“Hanya sanya orang-orang yang beriman itu adalah bersaudara, maka tegakkanlah *islāh* kalangan kamu bersama.” – maksud firman Allah dalam ayat 10, surah al-Hujurāt.

(oleh Ahad al-Ansār)

Menurut hukum dunia, bersaudara itu timbulnya kerana tiga sebab. Pertama kerana pertautan darah, lahir dari kandungan seorang ibu. Kedua kerana hubungan adat, anak angkat dan lain-lain. Ketiga kerana satu keyakinan sefaham, senasib, satu tujuan.

Semua sebab-sebab yang tersebut, tunduk kepada masa dan tempat yakni tidak kekal. Saudara setali perut tidak kuat menentang kerosakan yang dilahirkan pertentangan kepentingan, dan banyak cerita tentang perebutan takhta kerajaan oleh dua orang bersaudara yang mewarisi suatu kerajaan dari ayahnya. Saudara kerana adat istiadat lebih rapuh pula. Adapun bersaudara kerana faham dan keyakinan, di dalam Islam dibahagi kepada dua pokok. Pertama kerana semata-mata mencari kepentingan yang bersifat keduniaan. Kedua kerana mencari keredaan Ilahi.

Segala aizam lahir dari otak manusia, seluruhnya tak boleh lepas dari masalah kepentingan keduniaan, oleh itu persaudaraan yang lahir kerana faham (aizam) itu adalah dianggap oleh Islam masih rapuh. Sama sahaja dengan persaudaraan orang yang lapar sebelum kenyang, atau

persaudaraan orang mewah untuk mempertahankan kemewahan. Demikian pula persaudaraan yang lahir kerana ada persamaan atas satu falsafah, misalnya falsafah “sejarah kebendaan Marx”, inipun adalah semata-mata persaudaraan kerana kepentingan jua, kepentingan yang bersifat keduniaan, yang tunduk kepada zaman dan tempat. Falsafah itu ialah logik. Logik itu pula ialah fikiran. Sedang fikiran itu bukanlah satu keseluruhan kemanusiaan, tetapi hanya sebahagianya, yang di sisinya masih ada alam perasaan, alam kejiwaan, alam rohaniyah.

\*

Islam mengajarkan hanya satu cara “bersaudara”, iaitu *Ukhūwwah Islāmiyyah*. Semua kamu dari Adam, dan Adam itu dari tanah. Dari tanah kamu dibangkitkan. Tidak ada Tuhan selainnya. Muhammad ialah pesuruh-Nya. Kamu dihidupkan hanya untuk menyembah Tuhan dan membuat *islāh* di kalangan kamu bersama. Hidup ialah mengabdi. Dunia tempat sementara. Tujuan abadi ialah akhirat. Siapa yang membuat baik sebesar biji

sawi, semua akan dihitung pada hari akhirat, demikian pula sebaliknya. Tuhan, nabi, imam, dan kiblat kamu ialah satu, iaitu: Allah, Muhammad, Qurān dan kaabah. Tidak ada kelebihan satu dari yang lain kecuali dengan takwa.

*Ukhuwwah Islāmiyyah* bukannya melalui pengajaran sebagai suatu faham tetapi melalui pendidikan, latihan yang berupa Jemaah, baik di dalam sembahyang Jumaat, sembahyang berjemaah, seperasaan lapar dalam puasa, berkumpul beramai-ramai di dalam ibadat haji, bersama bertakbir pada hari raya, gotong royong membela nama Allah dan kemuliaan-Nya.

Bagi mewujudkan *Ukhuwwah Islāmiyyah* itu, Rasulullah (SAW) telah bersabda maksudnya: “Semulia-mulia kamu ialah yang dahulu memberi salam kepada temannya” (riwayat Ahmad dari Abū Hurairah).

Sabdanya lagi yang bermaksud: “Berjabat tanganlah kamu apabila bertemu satu sama lain, perbuatan ini menghapuskan dendam di dalam hati kamu.” Riwayat (Baihaqi dari ibn Abbās).

Sabdanya lagi maksudnya: “Barangsiapa yang ingin hidup berbahagia, hendalah ia menghubungkan silaturrahim sesamanya.” (riwayat Bukhārī dan Muslim).

Sabdanya lagi yang bermaksud: “Tuhan mewahyukan kepada aku, supaya kamu hormat menghormati, sehingga tidak ada seorang pun yang bersinggit hati dengan orang lain dan tidak seorang pun benci kepada saudaranya. (riwayat Muslim).

Dengan demikian pengertian bersaudara dalam Islam jauh dari maksud disebut keperluan yang bersifat sementara; bukan kerana suatu keinginan berkuasa, bukan kerana keinginan memperoleh kedudukan atau harata benda; bukan kerana penderitaan, bukan kerana kemewahan; kerana darah atau adat, tetapi semata-mata kerana Allah dan kerana mencari keredaan-Nya.

Seruan bersaudara dalam Islam itu tumbuh kerana perasaan kemanusiaan dan pengertian akan makna hidup yang hakiki, selaku manusia yang semulia-mulia makhluk. Bukan sebagai persaudaraan yang mencetus dari pemberontakan Perancis tahun 1789 yang sekarang takut kepada kebangkitan penduduk Morocco, Tunis dan al-Jazair yang memperjuangkan kemerdekaan tanah air, bukan seperti persaudaraan buruh – tani yang muncul dari pemberontakan Rusia tahun 1917 yang menganggap sebahagian manusia lainnya menjadi musuh dasarnya. Bukan pula sebagai persaudaraan yang dilahirkan oleh pengisytiharan “hak-hak manusia” yang menurut istilah orang Barat itu, atau pengisytiharan kemerdekaan Amerika tahun 1776 yang hanya menghormati asal kelahiran dan kemerdekaan manusia tetapi masih membezakan warna kulit di negerinya sendiri, dan terutama di Afrika Selatan.

Pada hari ini perasaan *Ukhuwwah Islāmiyyah* itu sedang tumbuh di seluruh penjuru dunia, dan di tanah air kita, fajarnya sedang menyinsing pula. *Allahu Akbar wa Lillāhi al-hamd*

#### SIAM KEKURANGAN GURU-GURU AGAMA ISLAM

Menurut berita A.P.B. Jakarta bahawa sekolah-sekolah yang diselenggarakan oleh pertubuhan-pertubuhan Islam Thailand sedang mengalami kekurangan guru-guru agama Islam serta mualigh-mualigh Islam. Pemimpin-pemimpin Islam Thailand telah meminta bantuan guru-guru agama dari Tanah Melayu dan Indonesia.

Selain memerlukan guru-guru maka sekolah-sekolah Islam di Siam ini sangat-sangat memerlukan kitab-kitab pelajaran. Bahan ini sangat-sangat di hajati oleh masyarakat Islam di Siam yang pada masa ini seakan-akan terputus perhubungan dengan umat Islam di berbagai-bagai negeri.